

## Taiòraa : Mareto 7.31-37

Ìrava Tuaroi : Mareto 7.34 « Ua hiò atu ra o ia i nià i te raì, òto iho ra, e ua na ô atu ra ia na, Èfata, o te faaauraa ra, la àmaha ».

Ei haamanaòraa : Te haamanaò-faahou-hia atu nei tātou, te feiā taiò veà, mai te peu e, e pāhonora ta tātou i nià i teie uiraa, a faatae noa mai i te reira i te Piha Òhipa a te Veà Porotetani i te Faatereraa a te Etārētia i te Pū no Pāōfai.

**T**e tahi mau manaò i nià i te taiòraaTe òmua nei teie parau i nià i te tahi faatiàraa parau no te tere o letu mai Tūria atu, Tītona e tae noa au i te tuhaa fenua no na òire 10, tei parauhia, te Tetapori. E tere roa teie tei tūpura-hia i nià i te maororaa e 8 àvaè. Eere teie tere mai teie mau tere tei mātau-noa-hia e tātou, e tere faaineineraa teie na letu i ta na mau pipi, mai te tahi faaiteraa na letu i te parau no te hau i muri mai i te tahi matai rahi. Ua hinaaro te Fatu i roto i teie tere e tītou i ta na mau pipi ia ìmi ia na e ia ìte i te tūpura òhipa i pūpūhia e ta na Metua i roto i to na rima. O te tumu atoà ia tātou i ìte e i roto i te pene 8.27-29, i teie faīraa faaroo a Petero : «O te Metia òe, te Tamaiti a te Atua Ora». Aita rā teie parau i tupu noa e aita e faaineineraa tei ravehia. Te auraa, eere teie parau i te tahi parau o ta te taata iho e to na ìte i hāmani, e parau rā teie ta te Atua iho i tuu i roto i te vaha o te reira taata, e tei riro i teie nei mai te tahi faīraa faaroo.

E ia tae mai rātou i roto i teie tuhaa fenua no Tetapori, ua āfaihia mai ia letu ra te tahi taata tariā turi e te fifi atoà hoì i roto i ta na parau. Eita rā e òre, hoè ā huru fifi teie e fārereihia nei e teie nei taata. No te fifi o to na tariā, i fifi atoà ai ta na huru horoà-raa i te tahi parau i te taata. Ia hiò tātou i teie huru àti e fārereihia nei e te tahi o to tātou mau taata i teie mahana, te ìte atea noa atoà atu ra tātou i te huru fifi e amohia ra e rātou. Eere roa atu i te mea òhie i te faatupuraa i te fārereiraa, a riro atu ai te parau no te tūāparaauraa ei rāveà no te faaiteraa i te manaò te tahi i te tahi. Ua riro atu ra te parau



Photo : D. Margueron.

no te taata mai te tahi mea tei faatea te tahi i te tahi. Rahi roa atu ai rā teie area, mai te peu e, aita e taata e faatoro mai i te rima o te here e te aroha no te aratai i taua taata ra i te pū o te ora.

Na roto rā i te òhipa tei ravehia e letu i nià i teie taata, te haapāpū maitai mai ra te reira i te huru hiòraa a te Atua i te parau o te taata to na iho rima i hāmani. Mai te peu e, te ìte nei te Atua i te faufaa o te taata i mua i to na aro, te tītou atoà nei te Fatu i te taata ia ìte atoà i roto i te Atua i te parau no to na ineine i te pāhono i te piiraa a te Atua. I roto i ta tātou parau, aita letu i faaora i teie taata i mua i te aro e te tāmoe-moe a te feiā tei āmui i taua mahana ra e i taua vāhi ra. Ua aratai rā o ia i teie taata i te tahi vāhi atea, ei faaiteraa i te nūnaa e, eere te òhipa faaoraraa a te Atua i te tahi òhipa teata taata ora no te faaānaānatae i te haūmi o te feiā mātaitaì, ei rāveà rā no te haapāpū faahou i te tūātiraa, te tiāturiraa e te tiaitūriraa o te taata mai i to na Atua, tei ia na te mau rāveà atoà. Te auraa, e tuhaa rahi atoà ta te taata mai i roto i te parau no te tūtauraa i te parau no to na faaoraraa.

No teie taata turi, ua ìte maitai teie taata i to na fifi ia āmui i roto i te tahi pupu taata e tariā maitai to rātou. Ta rātou parau e ta rātou mau tūtauraa, ua riro ia mai te pīnai o te reo ta te moua e faahoì i te vāhi no reira mai o ia. Tauga fifi no na ra, ua riro ia mai te tahi tūpau tei faahoro ia na e to na tāatoāraa i te ūputa o te pohe tei ineine atoà hoì no te fārii mai ia na. No reira, ua haafaufaa o ia i te mau pūai e vai ra i roto ia na, te manaò ìmi e te tiātu-

riraa i te ora. Mai te Atua i faatoro i to na rima no te pii i te taata e no te anī ia na ia fāriu e ia hoì, ua na reira atoà teie nei taata i te pūpūraa i to na tāatoāraa, ia mirimirihia e te rima metua o te Atua.

Te tahi atoà parau o te tiā roa ia tātou ia hiò mai i roto i teie parau, o teie huru rāveà tei faaōhipahia e letu no te faaora i te taata tariā turi, maa huare noa i nià i te rima, pātia atu ai i roto i te āpoo tariā, te tahi maa parau i pihai iho, ua àmaha te tariā e ua matara te parau. Te auraa, ua mutumutu te fifi tei natināti māoro noa na ia na, e ua ora mai te taata. Teie rā, aita atoà i moēhia ia letu te hiò i nià i te raì, i nià i te Atua, te Rahunui no te mau mea atoà e no te mau taata atoà, te horoà i te ora i te mau mea atoà e i te mau taata atoà, e tei pārahi tāmāu i pihai iho ia na e i roto hoì i ta na òhipa.

Te tāatoà no teie āamu, te faaite noa mai ra te reira ia tātou i te aro oha noa o te Atua i nià i te fifi o te taata, i te mau taime atoà e i te mau vāhi atoà. Ua riro teie faaoraraa tei tupu, ei faaiteraa i te òpuaraa ora a te Atua no te mau taata turi atoà e te no te mau vāvā atoà, i te pae no te tino e te vārua, e tei vai iho hoì i to rātou mau mai ia pātia e ia taurumihia e te rima faaora o te Atua. I roto i to tātou mau fifi, ua ineine te Atua i te faatoro mai i to na rima faaora.

Uiraa : Ua faaāmaha o ia i te turi e te vāvā, eaha rā hoì te turi i turi noa ai e te vāvā i vāvā noa ai.

Julien Mahaa